

四川大學古籍整理研究所編

儒藏

史部

第九十四冊

四川大學出版社

四川大學古籍整理研究所 編

儒藏·史部

儒林年譜

第四十四冊

四川大學出版社 二〇〇七年

國家「211工程」重點學科建設項目

國家「985工程」創新基地規劃項目

中國孔子基金會重大項目

目錄

武進李先生年譜續	清・蔣彤編撰		一
方儀衛先生年譜	清・鄭福照編撰		一六五
太鶴山人年譜	清・端木百祿編撰 陳謚補編		二〇五
俞理初先生年譜	王立中編撰 蔡元培補訂		二五五
退菴自訂年譜	清・梁章鉅自撰		四〇一
張介侯先生年譜	馮國瑞編撰		四三九
馮柳東先生年譜	清・史詮編撰		五四三
劉孟瞻先生年譜	(日本)小澤文四郎編撰		五八一



武進李先生年譜卷二

陽湖弟子蔣彤編

二十年乙亥，先生年四十有七。仍在鳳臺，寓報恩寺。斷酒肉，日啖麥飯，絕遊燕，不作詩文，終日翻閱釋藏，蕭然如老僧。時同邑孫仿山先生讓令懷遠，無錫薛畫水先生玉堂守太平，招之，各一往焉。北通州白公鎔督學安徽，渴欲一見，介畫水延致之，賓禮極優渥。先生食蔬素而已，神志慘穆，終食不發一議。白公益咨敬焉。

任際殷之獄，撫憲胡公克家意欲從輕讞，先生力爭數四，始得伏法。



儒藏

二十一年丙子、先生年四十有八。春始克歸、與兄五初相持慟哭、哀感左右。自是居同室、坐同几、形影不離矣。討究喪祭諸禮、因發徐氏讀禮通考諸書、及

大清通禮品官士庶儀合參之、定其可行於今而無悖於古者。暇則錄皋文先生易注、日盡二十紙。與子常書曰、吾黨如皋文庶幾不朽、人之難成也如此、而天又靳之、嗚呼、誰爲後來者乎。其冬、葬奉直公於錫山之鳳尾墩。

是年、山右韓公克均爲安徽承宣布政司。乙丑會試分校、先生出其房。

二十二年丁丑、先生年四十有九。春、以官事未了、仍遊



安徽仿山延主懷遠之眞儒書院。仿山固舊識也。有過必規。惑則辨之。有急則爲畫策。雖弈棋飲酒。亦爲裁量。居數月。懷遠知有先生而已。懷遠縣志已輟修九十年。久欲重輯之。仿山乃以編纂事質先生。先生鳳臺志以精覈稱。而鳳臺由壽州分出。於治爲簡。懷遠事宜詳於鳳臺者。且數倍。本其體例。恢而廣之。至冬功過半矣。安徽巡撫合河康公紹鏞在京邸重先生名。又兄五初之姻也。固邀入省垣。先生辭以從者多。恐重擾。不獲已。乃以志事屬同縣董晉卿士錫赴之。經桐城。桐城令乃鄉先輩呂幼心榮也。遂留終歲焉。

是年秋九月、如皋吳公箴屬修東流縣志。先生爲之釐定章程、提挈綱要、載筆而左右者、則張彥惟、成孫、李英望、頰、大興、方彥聞、履錢也。明年五月而書成。成孫、皋文子。頰、先生從子。五初子也。

十一月、作韓公六十壽頌。

二十三年戊寅、先生年五十。春正月、進皖省課、康公子竹吾、兆奎二子、頰、願亦隨侍。訂正懷遠縣志、至七月而書成。凡爲志十、記二、考一、表傳七、圖一、敘錄一、二十有八篇。其敘錄曰、四至辨而乖離正、都圖析而閭里聯、是以官守於上、而民守於官也。峩峩崑山、莫邪衛之。湯湯大淮、渦淝會之。孰是鎮之、孰是潤之。述地



域志第一。丁田民屯、國帑正供、轉漕東南、天庾是充。爲解爲支、率循成制、課鹽榷關、因民所利、土宜繁殖、各釐以類。述賦稅志第二。庠序之教隆、而名臣賢士、孝子貞婦之行作焉。書院之設、所以輔學校而損過、就中增美釋回者、莫講習若也。維勸學繫先覺。述學校志第三。禮莫重於祭祀、事有常、苾芬其饗、諸歆茲民德、勛茲民之稼穡。述祭祀志第四。神武不殺、而備不可弛。詰戎閑衛、乃齊乃止、於千萬年、治安上理。述兵防志第五。府事孔修、聖化覃敷、備豫偏災、謹茲倉儲。

皇仁蕩蕩、蠲復頻書。凡百君子、靖共爾位、哀此惇獨、勤

其撫字。述倉儲志第六。荆山巖巖、依之如城、孰則宜
飭、官寺郵亭、圻墁以時、吏民以寧。津則有舟、川則有
梁、車徒是濟、惟安惟康。述營建志第七。隄堰之興、以
稼下地。淮堧沮洳、漕可漑、淤可藝、弗云棄也。修而舉
之、曰察其宜、曰勿違其時。述水利志第八。禱祥災異、
君子不言、而水旱疾苦、民隱在焉。記載所弗刪也。述
五行志第九。太常稽古、爲學士羽儀、迄乎有明、戴籍
紛披、蒐采一曠、千年闕遺、後有作者、彙而錄之。述藝
文志第十。漢建侯國、當塗曲陽、平阿義成、向及龍亢。
晉屬馬頭、梁隸譙汴。唐析四境、入於旁縣。宋末置軍、
元明用因。述建置沿革記第十一。萬國玉帛、塗山是



會、征戰侵伐、戎事之大。汎覽前史、識其梗概。述歷代大事記第十二。郡邑棊置、一廢一興、六代列戍、乃數十城、孰真孰僞、壘址縱橫。述古城戍考第十三。令長侯相、鎮將戍主、漢晉梁魏、缺不可譜。元明以來、乃備縣尹丞簿焉、校官候人、亦差得舉數。述職官表第十四。文武甲科、辟舉貢士、登髦翼俊、代濟厥美、良將名臣、時焉蔚起。述選舉志第十五。師臣分茅、遠矣春卿、武功崛起、懿惟閑平。東平赳赳、平陰矯矯、父勲子忠、長世斯保。李柳壯略、榮名亦寶。裕後顯親、上下推恩。述世襲封蔭表第十六。龍亢桓世、傳經作帝師尊。五更晉元、子遂披昌、沖守貞元以亡。述桓氏傳第十七。

子通輔魏、平躋三公。明多勳戚，起於從龍。默齋忠貞，恭定廉正。諸楊接武，閎閎斯盛。聖清作人，樸樸莪菁。中丞總戎，爲國幹楨。述史冊英賢傳第十八、第十九。孝友睦婣，任卹士行之最良。蓋不可以不彰。政事文學之妙，貞介之操，而未見乎史籍之表襮者，又烏容略也。述耆舊第二十、二十一。賢孝貞順，惟曰女士。塗山啟之，桓氏似之，有以哉。或矢其愚，自立介乎其彌不可及。述列女傳第二十二、二十三。醫卜巫覡，皆術而已，研之而精，曰恆曰一，爰及神異，是爲方技。述方技傳第二十四。繫駒適館，所以安賓旅也。擇里而處，以令聞長世，君子交許之。述流寓傳第二十五。爲吏而



良臣職固宜、職則未稱、厥咎安辭。前哲所爲、敬而志之、先事之勞、後事之師。述良吏傳第二十六。名山崇崇、作鎮淮邦、經流十二、相維而東。四達者五經五緯、惟里有長、區以百二、千振相聞、弗閒鳴吠、規方畫疆、瞭若掌示。述縣境諸圖第二十七。在昔王君、始著邑乘。惟孫副使、再經刪定。百二十載、唐君繼之、別帙爲八、燦然前規。迄茲重修、歲紀九十、伊余固陋、每懷靡及。聖皇立極、羣稟成憲、道續執中、方悅吹萬。小臣不敏、職思官常、勤求民瘼、曷敢怠皇。述序錄第二十八。按懷遠志合繪一總圖、又鄉各一圖、每方一二里、村落橋梁寺觀工阜畢具、其徑路則密點細線、

以爲識別。眾圖湊合，則主撮不差。行路者持此，則按圖舉步，不須問歧，其精如此。先生嘗言，是可爲志書之法。宗若一統輿地圖，每縣得如此精密，實讀史者之大快，其爲用非小。後懷遠副貢生湯若荀修壽州志，山子先生修合肥縣志，董方立修咸寧縣志，皆參仿此書義例，方鄴作圖，一依此法。

二十四年己卯，先生年五十有一。在皖省，爲竹吾製銅刻漏。

四月，同縣左公輔按察浙江。

睿皇帝六旬萬壽，禮宜獻詩冊祝。

設千里專使盛儀，走安慶求代作。是月，康公調廣東巡



撫敦約明年春除館以待。韓公亦尋擢貴州巡撫、先生有贈序。二公去後、先生遂主講敬敷書院、節數年修脯所入、舉所負鳳臺雜款爲繳入藩庫、先生恥較貨利、如數償焉。

是年、兄子毓華捷順天鄉試、毓華卽頌也。

二十五年庚辰、先生年五十有二。二月、以合河中丞之約赴粵東、友人相送、飲別於枕芸書屋、江陰祝子常郡城莊卿珊輩共十餘人、以二十五日解維、同行者揚州鮑善之繼培、安慶鄧守之傳密、無錫華半樗希曾山子也。至蘇州訪趙季由、學轍、朱青立昂之、二子皆同鄉友。元和沈孝廉欽、韓約同赴粵東、故移舟載

之既以親老不果、請爲遊山主人、遂得盡支硎、穹窿、獅子、天半諸山之勝。凡三日而後行、有紀行一卷、見聞所觸皆書之。以四月二十二日到天使碼頭。時中丞以三月 陞見、適河南馬營壩大工方合龍、而南岸儀封又成漫口、

上命於回任時迂道察勘河工、別疏具奏、尙未返也。竹吾來迂、并邀山子、半樗同入節院。院故 國初封南平王、尙可喜之策、占地甚廣、其後圍包粵秀山、不知何時劃山在外、而園中尙極寥廓、野竹蔽天、蔓草塞途、亭宇四五處、基址尙一一可辨云。朱文正公珪撫粵時、尙時時觴客於此。文正公後、相傳其中有巨蟒、



閉不復啟者二十年矣。有一池甚深。石翳草閒者甚多。有數枚雄秀挺峙。高皆丈餘。絕可愛玩。然苦荒穢不可居。先生之來也。竹吾於署西南偏古榕下。闢屋以居之。翠陰交垂。幽鳥啁唧。意甚宜之。因顏之曰眠琴廬。而榜其門曰勤志館。

儀真阮公元時。節制兩廣。夙與先生交契。往存問之。并爲山子道地。而竹吾相推重。不願其他往。山子藏有桐城姚姬傳先生。鼐所選古文辭類纂。竹吾意欲刊行。乃馳書還取之。校閱付梓。先生以爲唐以下始有古文之稱。而別對偶之文。曰駢體。乃更選先秦兩漢下及於隋。爲駢體文鈔。欲使學者沿流而溯。知其